

Regional News Unit AIR Aizawl

Sunday, April 14, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Lok Sabha Inthlan buatsaih mekah vote thlak tura inzirtirna SVEEP neih a ni.
- Tun thla ni 19-a Lok Sabha inthlan vote thlak tura campaign chu state chhunga political party ten uar takin an kalpui mek.
- Lok Sabha inthlan thawh khatna atana campaign chuan ram chhung hmun hrang hrangah a vawrtawp a thleng chho.
- Dr BR Ambedkar-a piancham pha phak pualin President Draupadi Murmu-i chuan ram mipuite duhsakna a hlan.

<><><>

SVEEP CAMPAIGN

Lok Sabha inthlanpui buatsaih mekah Chief Electoral Officer, Mizoram leh Mizoram Cycling Association (MiCA) tangdunin nimin zing khan “I RIDE and VOTE for sure” tih thupua hmangin Aizawl Cycle Rally an buatsaih a. Cycle Rally hi Lok Sabha member thlanna a mi tam zawkin vote an thlakna tura inhrilhriatna leh inzirtirna atan buatsaih niin, Kulikawn atanga tlan tanin AMC Office, Thuampuiah an tawp a, CEO Pu Madhup Vyas hovin cyclist 103 an tel a ni.

CEO Pu Madhup Vyas chuan naupang kum 7 vel atanga pavalai thlenga phur taka thawk chhuak an awm chu lawmawm a tih thu sawiin, cycling rally a thawk chhuak zawng zawng te chuan hun hlimawm leh hriatreng tlak hun tha an neih ngei a beisei tih a sawi a ni.

Serchhip Election Office hnuiaia Systematic Voters' Education and Electoral Participation (SVEEP) leh Serchhip Photographers'(SPA) tangkawp ten nimin vek khan Serchhip Bazar Tualah Thlalak phochhuahna (Photo Exhibition) an buatsaih bawk.

He ‘Photo Exhibition’ah hian Govt Serchhip College a Electoral Literacy Club (ELC) President leh SVEEP Nodal Officer ni bawk Dr Zarzosanga chuan Serchhip mipuite chu a tam thei ang ber vote thlak theuh turin a sawm a, Serchhip District chu lehkhathiam tamna leh Mizoram District dangte zingah pawh Vote tlak that na ber District anih thu a sawi a, Lok Sabha Inthlanna vote thlak turah pawh uar taka Vote thlak leh tur leh vote thlak uar tura midangte zirtirtu pawh ni theuh turin Exhibition chhimtu mipuite chu a chah bawk ani.

Photo Exhibition an buatsaih bakah hian Serchhip Kawnpui’N’ Branch YMA ten Vote thlak uar tura inzirtirna lam hawi ‘Street Play’ an buatsaih bawk a ni.

SVEEP kaltlang a mipuite hnena Vote thlak pawimawh zia zirtirna chu Kolasib district hmun hrang hrang ah kalpui mek a ni bawk a. Nimin khan Kolasib Stadium, Project veng ah leh Khuangpuilam Futsal Ground-ah a huhoi, vote thlak tur a thu tiam lakna hun neih a ni.

Election Model Code of Conduct bawhchhiatna thleng thei venpuina cVIGIL app, Candidate te chanchin kimchang en theihna KYC app leh Voter Helpline app hman dan inzirtir a ni a, Kolasib hmun ualau laiah te inthlan ngai pawimawh tur a thuziak te tar chhuah a ni.

Polling Station a vote thlak tur a harsatna nei, kum 85 chung lam leh piangphung a rualban lote tan Home Voting kalpui tawh niin PwD voters-te nen nimin chawhnu khan Khuangpuilam, Kolasibah Voters Pledge an chham rual bawk.

<><><>

MNF MEDIA PUBLICITY

MNF Media Publicity Board Vice Chairman J. Malsawmzuala Vanchhawng chuan ZPM Sorkar thla 4 chuang lek enchhin tawhah kalphung thar a lang chiang tawh a, Lok Sabha inthlan-a vote zui zel chu mipuiin an ba tawh lo a ti.

Nimina Aizawl Press Club-a thuthar lakhawmtute an kawmna ah MNF Media Publicity Board Vice Chairman Pu J Malsawmzuala Vanchhawng chuan ZPM party ten Lok Sabha inthlan atana candidate an vawrh chhuah danah 'Kan ram, kan hnam leh kan sakhua' himna tura thawh hlawk tur aiin, sum hai chhuah dan thiam an dap zawk niin a lang a ti a, ZPM sorkarin, Budget an pharh tak-ah mahni inhai vurna lam a lansarh hle avangin, mipuiten ngaihtuahna sen nawn a tul tih a sawi.

J Malsawmzuala chuan nikum December ni 8-a Chief Minister in Ni 100 chhunga an hmalakna tur a puan tum khan, inrenchemna chungchangha hmalak an tum danah, anmahni-in hma an hruai ang a, official ten an zui an beisei a ni tih a sawi lai in; an hmalak chhunzawm naah erawh, inrenchemna lam a hawi chhunzawm ta miah lo thung niin a lang tih a sawi a. Assembly Zawhna leh chhanna atanga a lan danin, Adviser to CM 5 te hian Staff 34 neiin, sorkarin thla khata sum a senso zat chu cheng nuai 15 lai a tling a, an sorkar chhung hian heng senso atan ringawt ah pawh hian cheng vaibelchhe 1000 chuang a kal ral dawn a ti a ni.

Chief Minister Office lian tak, hautak zet mai din a nih thu sawiin, a chhan chu thuneihna zawng zawng Chief Minister kutah dah a nih tak vang a ni ber a ti a, hei hi budget document in a nemnghet a ni a ti. Chief Minister in port folio a nei ve lo ang an tih laiin, engkim inthlun khawmna Finance leh Planning te a chang a. Budget-a hmathar lakna tur tarlan, Capital Outlay cheng vbc 1953.75 atangin Chief Minister chan Finance ah cheng vbc 1219.70 zet dah a ni a, hei hi zaa 62 aia tam a nih thu a sawi a. State sorkarin ama puala a thawh ve phak chin te a beitham a, CSS ho chu hmasawnna ruhrel dinna ber pakhat a ni a, CSS te hi Planning kaltlang veka kalpui anih avangin, Matching share tur zawng zawng hum vektu Chief Minister kutah engkim a awm ta vek a. ZPM sorkarah hian inthlan hmaa an sawi letling chiahin, Chief Minister Office thu em em neih chhoh a ni ta a ni, a ti.

<><><>

CAMPAIGN

ZPM Thalai Headquaters buatsaiha Aizawl Municipal Corporation huamchhunga street campaign chu nimin khan zawhfel a ni a,

He huna thusawitu Minister Pu K Sapdanga chuan, kumin inthlan turah ZPM Party chuan thudik tawk lo hmanga beihna an tawk nasaa Pu TBC Lalvenchhunga pawh car rental chungchangah a hmingchhe thei ang bera puh a ni a, mahse Car Rental Association ten ngaihdam dilna thu an chhuah zui a, anni chuan an ngai dam chiang hle a ni," a ti a. An party candidate Pu Richard Vanlalhmangaiha pawh, thenkhatin tute emaw mawng hiatin politics ramhlui zia leh thu belhchian dawlo hmang bawkin an bei leh a, hei pawh hi nakin lawkah thu dik a la rawn lang chhuak leh mai dawn a ni, a ti.

Hetihlai hian, PC Party chuan an candidate Pi Rita Malsawmi vote turin mipui an sawm a, Chhinlung chhuak Zofate inpumkhatna tura rim taka thawk tu a ni an ti a, Zofa thendarha awmte, insuihkhawm leh theihna tura ZO-Reunification Organisation (ZORO) in theihtawp chhuaha a hmalakna-a Mizo hmeichhia te zinga mi a ni an ti.,

ZORO Founder Brig.T.Sailo-a'n Zohnahthlak thendarha awmte, rorelna pakhat hnuiai kùnza theihna tura hmalakna thui tak alo neih tawh, hlawhtling taka hlenchhuah a nih ngei theih na'na thahnemngai taka chhunzawm a, kum 10 chuang ZORO Gen Hqrs-a Secretary chanvo chelh mektu Pi Rita Malsawmi chu tling ngei se an ti tih an sawi a ni.

Congress Party Street Campaign nimina Aizawl Ramhlun North a neih ah Mizoram Congress chuan sakhaw humhimna Campaign an nei a, he huna thusawitu Pu LC Tluanga, Tlangnuam chuan Congress party chu sakhaw tenau te, tribal leh dalit hnamte tih duhdah an nih loh nana ban phar thin a ni a ti a, ualau takin mahni sakhua kan tlangau pui theihna hi CONGRESS dinna a la ni reng a ni. Biak in hal te, missionary te dodalna thleng thinah hian Congress hian inhnamhnawihna a nei lo a ti.

He street campaign-ah hian Pi Vanlalawmpui leh Pi Meriam L Hrangchal pawhin thu sawiin Pi Meriam L Hrangchal BJP leh a thu rualpuite hi a sorkar nawn leh dawn a nih chuan culture pakhat, sakhaw pakhat, hruaitu pakhat tih thu a tlangaupui mek a ni a ti a, Centralah Congress kaihruai leh BJP kaihruai chauh duhthlan tur a awm a, MNF chu BJP thawhpui a ni sa a, ZPM pawhin BJP a thawhpui dawn lo a nih chuan sawi chian hun a ni tawh a ni, a ti bawk.

BJP Mizoram President Pu Vanlalhmuaka chuan, "Mizoram ah BJP inhlauh siakna tuh a ni a, hetiang thu diklo Zoram mipuite hnena thehdarhtu chu Congress Party an ni a, anni Party hi Hnam leh Kohhran hmanga Campaign hrehlo an ni," a ti.

Pu Vanlalmuaka chuan, "Kum 2024-ah Mizorama ZPM a Sorkar chiah khan Lengpui Airport leh ZMC chu Central kuta hlan turin Central lam an dawr nghal a, nimahsela Lungbang sut ang maiin Central hotute an dawr hi an hlawhchham a, Central lam chuan an State Property a ni a, anni chuan an laksak dawn lo a, Mizoram chuan an chief Minister hovin project siam se, mhu mi hnuah ṭanpui in ngai a nih chuan an ṭanpui ang tiin an lo chhang a ni a ti a. Sorkar hmasa MNF Sorkar khan Lengpui Airport kha enkawl harsa an tih avangin Central kutah dah an tum a. Kha tih lai khan ZPM Party khan, Mahni bungrua pawh enkawl zolo Sorkar nēp an tih thu an lo tlangau pui chiam tawh a. Tunah Sorkarna an han chang a, a hmaa an duh loh an lo sawisel kha tih ve an tum leh tho a. Kalphung thar chu eng tihna mah a nihloh zia a lang chiang a. Mi duh ang an duh ve zel tho a, mi tih ang tih an hreh chuang loh avangin kalphung thar hmel a lang chuang lo a ni," a ti.

Pu Vanlalhmuaka hian Champhai a BJP District Office ah nimin khan Press Conference neiin, Street Campaign a nei bawk a, District hruaitute leh State hruaitu ḫenkhāt te'n an ṭawiawm a ni.

MNF Party Candidate Pu K. Vanlalvena chuan Puitu neih miah lohna hmun, Parliament chhunga an tal changin, a hnungah Mizo mipui an awm tih hria a, an thlawp ḫatna chuan a ti thlamuangan, huaisenna a pek thin thu a sawi. Aizawl hmun hrang hranga nimina Street Campaign neih ah MNF MP Candidate Pu K Vanlalvena chuan kan Ram, kan hnam leh kan sakhua a him theihna tura theih tawp chhuah chhunzawm zel thei turin, Mizo mipuiten hnathawhkawr hak zawm tir turin a ngen a ni.

<><><>

CAMPAIGN FOR 1ST PHASE OF LOK SABHA ELECTION INTENSIFIED

Lok Sabha inthlan thawh khatna atana campaign chuan a vawrtawp a thleng chho mek.

Political party hrang hrang hruaitute chu an party candidate-te tan ngawrh takin an campaign mek a ni. Ram chhung hmun hrang hrangah vantlang inkhawmte kovin kawthlerahte an campaign mek hlawm a ni.

Lok Sabha inthlan thawh 1-naah hian state 17 leh Union Territory 4-a Lok Sabha seat 102 atan April ni 19 khian vote thlak a ni dawn a. Hemi rual hian Sikkim-a Assembly bial 32 leh Arunachal Pradesh-a Assembly bial 60-ah vote thlak a ni dawn bawk a ni.

Lok Sabha inthlan thawh khatna vilveng tur hian General Observer 127, Police Observer 67 leh Expenditure Observer 167 ruahman an ni.

<><><>

DELHI LT GOVERNOR ASSURES NOT TO DISCONTINUE SUBSIDY SCHMES

Delhi Lieutenant Governor Vinai Kumar Saxena chuan tuna Delhi-a khawphetha chhit man, tui man leh bus chuan man a tlawma chawi mek chu chhunzawm zel a ni ang a ti.

Vinai Kumar Saxena chuan Delhi-a miretheite tana subsidy scheme kalpu mekte chu tihtawp a ni dawn lo tih Delhi mipuite a hrilh a. Politics khelhna hmanruaa thuthang lekvakte chu ngai thutak lo turin a ngen a ni.

<><><>

PRESIDENT MURMU GEETS CITIZEN ON THE EVE OF THE BIRTH ANNIVERSARY OF BR AMBEDKAR

Vawiin hi India danpui duangtute zinga a khaipa ber Dr BR Ambedkar-a piamchampha phak a ni a. Hemi pual hian President Draupadi Murmu-i chuan ram mipuite duhsakna a hlan.

President chuan Dr Ambedkar-a thuken leh ram hmasawnna tura tha leh zung a lo sente chu vawng reng turin mitin a chah a. Ambedkar-a chu ram tana nasa chungchuang taka hnathawktu a ni a, dan hremi a ni a, zirna huanga mi thiam, economic lama mi thiam, vantlang nunphung siam that duh mi leh politics-a hruaitu a nih thu President chuan a sawi a ni.

Dr Ambedkar-a pianchampha phak vawi 133-na lawm tur hian Brihanmumbai Municipal Corporation chuan programme hrang hrang a duang a. A chenna Rajgriha-a amah hriatrengna hmun an siam Chaityaboomi leh a chhehvel chu mawi takin an chei bawk a ni.

<><><>